

Соколёнок



4/2018

ИЮЛЬ - АВГУСТ

# Лашын



БАЛАЛАР УШИН ЭКИ АЙДА БИР КЕРЕ ШЫГАТАГАН РЕСПУБЛИКАЛЫК ЖУРНАЛЫ





# Навсипли бала шагым

Бала шак айлак тез кетеди. Меники де аста кетип барады. Тек туьнегуьн биринши класска келгендей боламан, ама мен аьли 7 кл окувшысыман. Кишкей заманнан алып карасам, коьп кужыр затлар эсимнен кетпейдилер. 4 ясыма толып беске шыкканда атам мага эки аяклы тетик (велосипед) алды, мен оны тез айдарман деп ойладым, ама дымалап кеткенимди озим де билмей калдым. Йыгылганда аягымды тырнадым, ама ол зат мени токтатпады, мен аста-аста айдап уйрендим, соньында кеделерден де озатаган болдым. Эсимде, кайтип анам, атам болып Махачкалага кыдырып барганымыз. «Шайтан денъгершиги» деп аталган денъгершиктинъ энъ йогарына коьтерилгенде, озимди коькке мингендей этип коьрдим, а астымдагы аьдемлер мага кумырскалардай болып коьриндилер. Сонъ биз бир уйкен кафеге бардык, онда меним озимнинъ суйьген таьтли зияпетлеримди алдым. «Кызым, коьп таьтли зат ашасынъ, тислеринъ туьсер. Тиссиз сен эрши боларсынъ!» — деп атам куьлип айтты мага. «Мен буьгуьн ашайым, авылда мундай кафе йок эм мундай тортлар йок!» — дедим мен тарелка туьбинде бир зат та калдырмай. Аьр каникулда Пятигорск калага энем Марина Юрьевнага барамыз, онынъ неше туьрли вареньлерин ашаймыз. Энем бизди бек саклап турады эм аьр келуьвимизге бир туьрли затлар ашамага аьзирлеп коьяды, туьрли ерлерге кыдыртады. Сочи калада биз бир неше кере тыншайганмыз. Ол куьнлер бир де эсимнен таймайдылар.



Бала шагымды эсеме алсам, мен аяр заманда да, озимнинъ тувган куьнимди, Янъы йылды эскермеге суьмен. Аяз-атай аькелди деп ойлап, елка астындагы савгаларга суьйинемен. Анамнынъ орыс тилинде, неге десе ол менде орыс миллетли, аты Екатерина. Атамнынъ ногай тилде эртегилерин тынълап озькенмен. Анам аьли тап-таза ногайша соьйлейди. Баьри ногай аьдетлерди де биледи, озьзи «Айланай» ансамбльде ногай биювлерди де бийийди. Анам аяр заманда да «Иван Царевич и серый волк» эртегисин, атам майлы эт суьймейтаган «Тайтериш акында эртегиди» айтататаган эдилер. Бизим аьелде баьри де йырламага суьедилер. Атам кешлерде колына гитара алады, ногай йырларды йырлап баслайды, биз де ога косыламыз. Мен эки халктынъ да байрамларын бек аьруьв билемен эм суьмен. Мен аьелде уьйкен бала, Низам бебем 4 класста окыйды, Имран аьли де кишкей. Атам бизге дайым да айтып турады: «Кызым, сен бебелеринъе коьмек этпеге керексинъ, а олар озькенде сага ярдам этип, сени коршалап турарлар!» – деп. Ол бизди тыпаклыкка уьйретеди. «Наьсипли уьйдинъ балалары бир-бирине баьтир дер, наьсисиз уьйдинъ балалары бир-бирине котыр дер» деген такпакты мутпанъыз деп тербиялайды. Бу меним аьелдеги наьсипли вакытларым, а мектебте болса меним яшавым баскалай кызыклы болып озьеди.

Мен ясамага, йырламага, китап-лер окымага суьмен. Былтыр Кадрия Темирбулатовадынъ ятлавлары бойынша озган ярыста мен биринши орынды алдым. Калай ярайды мага онынъ ятлавлары. Мен оларды конкурс болмаса да, уьйде окымага суьмен. Сол суьйимди бас деп мага ана тил окытувшысы Насыпхан Ибрагимовна Хасбулатова берген, ол мага тетей де болады. Аяр бир дерисимиз бизим поэзия такый-



каларыннан басланады, сол ятлавлар эсте сакланадылар эм сочинение язганда бек керегедилер. Коьп ашык дерислер озьедилер бизде «А» дан «Я» га дейим, Салимет Майлыбаевадынъ шаьйирлик дуньясы бойынша, Мурат Аvezовтынъ, Магомед Кожаевтинъ, яс шаьйирлеримиз Асан Наймановтынъ, Гульфира Бекмуратовадынъ эм коьплеген баскалардынъ поэзиясы ман таньсамыз. «Лашын», «Маьметекей» бала журналларын, «Шоьл тавысы» газетасын суьйип окыймыз. Бизим класс етекшимиз Межитова Марина Ахматовна классымызды тыпак этпеге шалысады, коьп пайдалы ашык дерислер озгарады.

Мен озимди бек наьсипли деп санайман, неге десе мен Уллы Ногай халктынъ кызыман, таьрийхимиз, адабиятымыз бай, мектебимиз ийгилердинъ санына киреди, атам-анам бизге баьри тапканларын береди-лер. Сонъы уьшин тек беслерге окымага шалысаман эм озькенде Элиме пайда аькелип яшаякпан!

*Амина Хасбулатова, Терекли-Мектеб Кадрия атлы орта мектебининъ 8 кл окувшысы.*



# ЯНЪЫ ЯТЛАВЛАРДАН

Айнара Нургишиева

## Терекли-Мектеб

Исси куьннинъ астында,  
Йылы елдинъ койнында.  
Кийип коьйлек яй кумнан,  
Коьз алдымда ойнаган,  
Шешек кимик обьсеген,  
Коьзи кирген коьргеннинъ,  
Бир себебин билмеген,  
Бийлеп шоьлдинъ тоьр бетин,  
Ятыр меним авылым,  
Карап ога авлагым,  
Дуныяда кереклим –  
Баба юртым – Тереклим!

Неге тынык  
Больш калды бу кала?  
Белки, аьли  
Етиспейсинъ сен мага?  
Белки, суьйим  
Сырын билдим мен аьли?  
Ол акында  
Билмей бирев, не пайда?

Юз йыллаган  
Бийлеп кайгы кушагы,

Буькирейген  
Кавказ тав шоьл уьстинде.  
Кумдай коьктен  
Туьсип юлдыз косары,  
Шанъ басканды  
Орамларды бу туьнде.

Меним дувам  
Оьзи суьйим болады.  
Аь мен оьзим  
Оьмир кудай кулыман.  
Толкынласкан  
Кан тагы да агады.  
Суьйип сага  
Ян яраткан ер инсан!

Кимге сенип  
Дува эткен биревди,  
Аьдемлердинъ  
Каравыннан сакладым.  
Кудайымнынъ  
Янга синъген суьйими  
Ялгыз экен.  
Оны энди анъладым.



# Бизим Лиза...

(Биринши ксези 3-нши номерде)

Алдыңгы меним макаламда белгили кызымыз, сулыплы окытувшы эм шаьйир Лиза Желкашиева ман студент болып окыган йылларым акында айтып оздым, йыллар оьтти эм бизге йыллар тагы бир кере сосы кызымыз тек абырайлы эм ямгат арасында коьримли болып токтаганын коьрсетти. Аьне сонынъ акында да бираз хабарламага суьер эдим...

Лиза Махмуд кызы районнынъ Куьнбатар авылына ерлесип, мектебте дерисин баслаганлай ок, биринши куьннен алып, института алган билимин практикада кулланмага шалысты, оьткерилетаган дерислеринде алдышы совет педагогларынынъ сулыбын киргистпеге каьрледи. Сонъ болса коьплеген методикалык пособиелерин де кулланувына айырым эс эткен. Энь де маьнелиси – ерли миллет коллективи мен ортак тил таппага. Шалыскан мырадына етер дегенге усап, Лиза Махмуд кызы мырадына етти: онлаган йылларынынъ тамамлары да суьйинтпей болмайды. Биз соьйтип ойлаймыз эм санаймыз. Аьруьв педагог болды, авылямагаты арасында тувыл, савлай район яшавшылары арасында сыйланды. Ййги затларынынъ бириси балаларды ийги окытув ман бирге яратувшылыгын да тасламады. Район газетасынынъ бетлеринде аьлемет ятлавлары эм публицистика материаллары шыгып турдылар. Олар Ногай шоьблине, онынъ аьдемлерине, онынъ табиатына багысландылар. Абырай-сый дейтаган сол тувылма, Лиза Желкашиева районо, Ногай район администрациясы, солай ок ДР-сынынъ билимлендируьв эм илми Министер-

ствосы ягыннан коьплеген сый грамоталарга тийисли этилинип турды. Сонъында талаплы педагог, Куьнбатар авылынынъ орта мектебининъ окытувшысы Лиза Желкашиева РСФСР-динъ ат казанган окытувшысы деген йогары атка тийисли болганы коьп зат акында айтпайма экен? Бизим куьнбатаршылар аьлиге дейим де онынъ атын тек ийги ягыннан айтып турадылар. Мутпайдылар. Авыл мектебининъ эсли окытувшылары Абдулла Янполов, Абусуьпян Ганиев, Вайдат Маликова эм баскалары онынъ акында соьз бардырылса, мине-буьгуьн де бир уьйкен оьктемлик пен «Бизим Лиза» дейдилер.

Тагы да бир заттынъ акында буьгуьн айтар эдим. Лиза Махмуд кызы окытувшы, мектеб завучы эм мектеб директоры болып аьрекет эткен йыллары ишинде авылдынъ Культура уьйи мен косылып коьплеген ийги шаралар озгаратаган деп, эсли авыляшавшылар айтсалар, коьнъилинъ ашылып кетеди. Мен оьзимде журналист эм шаьйир эсапта тувып-оьскен авылымда, сонынъ ишинде мектебинде йолгысларда аз болмаганман. Лиза Махмуд кызынынъ куллыкты, аьдемлерди суьерлиги, ортак тил тавып билуьви, яныплылыгы оьзине тартпай болмайтаган эди. Тек не пайда, бакты бай терек дегенге усап, бактысы оны оьзининъ тувган-оьскен, яшавга йол берген Карашай-Шеркеш ерине аькетти. Белгили язувшымыз эм сыйлы агайымыз Суьйин Капаев пен бас косып яшавынынъ сонъгы куьнлерине дейим бирге болды. Олар бир-бирин суьйип, бир-бирин аньлап алган эдилер...



Сосы макаламды тамамлай келе, мунавдай зат акында айтпасам, соьзимиз ярты да болмага болаяк. Куьнбатар авылында яшаганда, Лиза Махмуд кызы ногай язувшыларынынъ эм шаьйирлерининъ язылганларын кенъ кепте пропагандалав этип калмай, оьзи де оьзининъ ятлавлары ман шоьл ерининъ яшавшыларына ийги йол тапкан эди. Онынъ бизим Куьнбатар авылына багысланып язылган ятлаваы, сонъында йырга айланып мине-буьгуьн де авылда болатаган баьри шатлыкларда да йырланады. Эм авылдасларым «Куьннен куьнге оьседи Куьнбатар» деген канатлы болып калган соьзлерин кайтаралап турадылар. Дурысында да, Лиза Махмуд кызы айтканы дурыс болып шыкты дер эдим-аьли бизим Куьнбатар авылы уьйкен болып калмай, бийиклевге де барады. Бир неше авылдасларымыз эки шарлаклы уьйлерин саладылар эм оларда Лизадынъ йырын оьктем йырлайдылар...

Оьседи Куьнбатар, оьседи эм онынъ оьсуьвинде оькытувшы эм шаьйир Лиза Джелкашиевадынъ уьлиси де бар...

Бизим Лиза деп айтып,  
Оьктем бола Куьнбатар.  
Сени сыйлап, эткен абыр,  
Аьли де коьп онда бар!  
Йырларынъды йырлаймыз,  
Ятлавларынъ оькыймыз,  
«Ногай давыс», «Шоьл тавыс» –  
Бетлерин де караймыз!  
Алла берсин ийгилик,  
Онълы болсын яшавынъ.  
Сага салам береди,  
Дагыстаннан ногайынъ!

Сосы сыдырраларым меним Лиза Махмуд кызы Джелкашиева-Капаева акында. Белки, алып оькысанъ, бизим оьткен студент йылларын эм буьгуьнги сага меним катнаслыгым, ногайымнынъ катнаслыгын анъларсынъ!

Коьрискенше куьнлеримиз бизге дайым да куьлкиси мен карасын!

*А.Култаева, Махачкала.*



# Халк ыбнери ыбмирли

\*\*\*

Эгин эксенъ – илми мен,  
Молыгарсынъ элинъ мен.

\*\*\*

Аьрув куллык – аьрув онъыс.

\*\*\*

Йолавшы аяз тилер –  
Эгинши ямгыр тилер.

\*\*\*

Не шашсанъ, соны орарсынъ,  
Не айтсанъ, соны эситерсинъ.

\*\*\*

Онъыслык эгиншидинъ колында.

\*\*\*

Таза урлык – йогары онъыстыр.

\*\*\*

Шашсанъ – аларсынъ,  
Шашпасанъ – каларсынъ.

\*\*\*

Ызандагы аслык тувыл –  
Бежендеги ол – аслык.

\*\*\*

Эгиншидинъ ярти ыбмири  
Кырда ыбтер, мырадына етер.

\*\*\*

Сабаннынъ туьби – сары алтын,  
Колы уста – уьйде йылтын.

*Йыйган А.Култаев.*





# Мереке Ханбиче Хаметовадинъ юлдызы



Ханбиче Хаметова – белгили дагестан шайири. Тувган 1938 йыл 28 июнь куьн ДАССР-дынъ Хив районынынъ Цлах авылында. Гамзат Цадаса атындагы Дагыстан патшалык педагогикалык институтын битирип, окытувшы, республикадынъ окытувшылар билимин обстиретаган Институтында методист, Дагыстаннынъ язувшылар Союзынынъ секретари болып аьрекет эткен. Аьлиги заманда «Лашын» деп аталган лезгин тилинде балалар журналынынъ редакторы.

1974 йылдан алып СССР–динъ язувшылар Союзынынъ агзасы. Биринши ятлавлары 1958 йыл «Коммунист» деп аталган лезгин тилиндеги газетасында эм сонъында «Дагыстан кыскааяклылары» журналынынъ бетинде шыкканлар.

«Ойлардынъ оьрнеклери» деп аталган биринши ятлавлар йыйынтыгы ана тилинде 1964 йыл Дагыстан китап баспасында шыккан. Онынъ язганлары айырым китап болып Москвада, Махачкалада эм озгелер ерлерде шыгып ткрадылар.

Ханбиче Хаметова коьплеген адабиат-критика макалаларынынъ авторы да болады. Белгили шайир Сулейман Стальский эм Етим Эмин атындагы савгаларынынъ лауреаты да болып келген.

Ханбиче Шихрагимовна Хаметова – ДАССР-дынъ культурасынынъ ат казанган куллыкшысы, Дагыстаннынъ халк шайири деген атларга да тийисли этилинген.

Биз оны бизим окувшылар атларыннан келип тургун 80 йыллык мерекеси мен кутлаймыз эм берк ден савлык, узак оьмир эм яратувшылыгында янъы бийиклевлерди сагынамыз!

*С.Култаева.*



# „Тамышыэм тас“

(дестан уьзиги)

Хазар калай ол бетине ашувлы,  
Бийик тавдынъ алып турган тынысы.

Тобгерекке ол салады коркыныш:  
Ол билгени сол кылыш эм камышы.

Кара сокпак. Аьши онда ким облген?  
Ат ятыр. Ызлары да айлак коьп...

Ат тебине, пысылдайды эм обзи.  
Сен бир кулы. А ол болса иеси.

Хазарга ол не этпеге болады –  
Ягар уьйин, суьйгенин де алады.

Тобегерекке ол салады коркыныш:  
Ол билгени сол кылык эм камышы.

Сес шыгады бир авылдан баскага.  
Кара канды аьзирлейди Хазарга:

Узак авыл. Эм онда да бир кыз бар,  
Баа аты эм сыйы да бек баа.

Хазар закон канлы эм де ашувлы,  
Кыз алдында йокты онынъ тек куьши.

Бир авыздан баскаларга айталар,  
Айтадылар аты болса – Перистан...

Булак беттен коьринеди куьлетки –  
Хазар колы тастан беркти эм куьшли.

Айван кимик, айындырык турган ол.  
Йыр ушады тав басына. Тек сак бол!

Йыр ушты эм калды бирден тынып.  
Туры артта камыслар да сырласып...

Булак туйпте юлдыз калды калтырап,  
Перистан да ятыр колы салпырап...

Кайда онынъ ярасыгы эм сыйы?  
«Хазар колда энди кыздынъ сав  
шашы...»

Байга бирев бирзат этип болмайды –  
Суьйген затын Хазар этпей турмай-  
ды!

*Лезгиншеден коьширген А.Утеев.*



# Эртегилер дуньясында

## Туьлки эм йылан

(авар эртигиси)

Бурын-бурын заманда туьлки эм йылан савлай дуньяды айланып шыкпага деп токтайдылар экен. Олар коьп заман орманлык пан, авлаклар ман, тавлар ман эм каялар ман барадылар. Сонъ бир кенъ йыылган йылгага келип каладылар. Оннан оьтпеге керек эди.

– Кая, ялдап оьтейик, – дейди туьлки.

– Мен ялдап болмайманша, – дейди сол заман йылан, алдай берип оны.

– Мен коьмек этермен, сен мага оралып токтасанъ болады, – дейди туьлки.

Йылан туьлкиге ийги кепте оралды эм эндигиси олар ялдап баслайдылар.

Туьлкиге бек авыр болады. Тек ол билдирмейди эм ялдай береди. Ама куьши тая, куьши тая береди. Шыдайды, шыдайды.

Йылга ягага еткенде, йылан туьлкиди тагы да бек сыгып баслайды. Сыкканда да бек куьшли сыгады эди.

– Сен не этеексинъ аьши? Олай этип сен мени туншыктырмага да боласынъ, – деп туьлки кышкырады.

– Сага сол да керек, – деген ога явапка йылан да.

– Даь, мен энди оьлсем ярайды, – деп куьрсинеди туьлки. – Тек бир зат акында мага бир аз кыйынлы болады. Биз экимиз не шаклы йыл дослык тутамыз эм сенинъ сыпатынъды мун-

дай ювыкта коьрмегенмен бир де. Мага сонъгы тилегимди эт-оьлеек алдымда бир аьруьв кепте сенинъ юзинъе сама карайым.

– Ийги. Мен де сага сонъгы кере карамага суьемен, – дейди йылан эм туьлкиге басы ман янасады.

Туьлки сонда ок, йыланнынъ басын капты эм шайнап баслады. Сонъ аста кепте сув ягага шыкты. Эндигиси ол оьлген йыланнан басын аман акашты. Сонъ булай деп кышкырды:

– Оралатаган дослар ман бир заман бас коспанъыз!

*Аваршадан коьширилген.*



# Тамышылардың кыдырувлары (эртегеси)

Тамышы кыз обзининь кыймаслары ман тенъизде бир тилде, бир ниетте болып яшайтаган болыпты экен. Куьннинь коьзи шыгады эм йылувын яды. Сол заман соьлеги тамышы енъил болады эм коькке коьтерилип кетеди. Ол коркады эм ак булыт арасында яшап баслайды. А булыт болса, бийик коькте кыдып юретаган болган экен. Эртеннен кешке дейим де. Тамшысы тоьмендеги авлакларды, эгин кырларды, орманлыкларды эм тавларды да коьреди.

Олардың касында баска булытлар ушадылар. Олар эндигиси бирге косылмага эм уйкен булытка айланмага мырат этедилер. Баьриси де разы боладылар. Эндигиси сосы булыт бек уйкен эм караганда бир карасымал болып коьринеди. Обзи де бек авыр болган. Соьлеги тамышы олардың арасында ялкады эм ян-ягына каранып турады экен. Ол аьр заман обзининь тенъизи, кыймаслары акында ойлайды, эм оларды коьрмеге эм йолыгыспага суьеди.

Бирден куьшли дегенде куьшли ел эсип кетеди. Соьлеги булыт астаакырын коькке коьтериледи эм кезеди.

Бирден айындырык яркырайды. Ол куьшли кепте ярыгын таслайды. Булыттан эндигиси коьз яслары шыгып баслайдылар эди. Олар ерге туьседилер эм йыйылысып, эгин кырларга эм авлакларга кетедилер. Сув коьп бола береди.



Кишкей йылгалар ювырысып уйкен йылгага косылдылар, эм олар тенъизге карап кетедилер. Олардың арасында аьне тамышы да бар эм ол да ювырады.

Соьйтип алдынгы тамышы обзининь тувган тенъизине кайтты эм онда обзининь кыймасларын коьрди. Суьйинди эм аьр бирисин суьйди. Олар оны ман йолыканына бек разылар эди. Мине кайтип тамышы уйкен дегенде уйкен кыдырув этип озь ерине аман эсен кайтып келди.

*Аьзирлеген С.Култаева.*



# Тек туьнегуьн...

Улым уйден  
Шыкпага деп алгасай,  
Телефоны  
Занъ-зунъ эте токтамай.  
Эм оьзи де  
Танымаган бир кыз бан,  
Сойлей бере,  
Эш бир затка карамай.  
Йыллар кайтип  
Ушып кетип калады!  
Тек туьнегуьн  
Занъ согылды мага да...  
Куслардынъ  
Завклы сеси шыгады –  
Сыйлы эди  
Бу сес бала шагымда!



# Шляпам сувга туьсти



Шляпам да сувга туьсти –  
Эм акырын ялдайды.  
А балыклар коьлдеги,  
Бу кеме деп ойлайды.  
А куслар да ойлайды,  
Палубага минермиз.  
Ягасында ял алып,  
Африкага етермиз!  
Шляпам да сувга туьсти –  
Мен ягада тураман.  
Тек янъысын эндиги,  
Алмага да болмайман...  
Шляпам да сувга туьсти –  
Эм акырын ялдайды.  
А балыкар коьлдеги –  
Бу кеме деп ойлайды.



# Тюбгерекке ярк сепкен окытувшы.



аттынъ сыйын коьтерип юрген кызымыз 1981 йыл дипломын алып, Тукуй-Мектеб авылдан ис йолын баслайды. «Биринши куьнлеримнен ок мен анъладым: бала-ол тек билимге толмага керек савыт тувыл, ол озининъ сырлары ман, ойлары ман толган, боьлиспеге суьйген, озин анълаган аьдемге талпынган аьдем. Сонны уьшин мен аьр бир балага тек окытувшы болып калмай, онынъ йолдасы, тенъи, насыьхатшысы, анасы болмага шалы-

Мен сосы куьн коьзиндей яркыраган кыскааяклыды коьптен таныйман эм аьр заман да онынъ куьлемсиреп турган юзине, куватлы кебине, ашык юрегине сукланмай болмайман. А озиннинъ окытувшылык иси акында соьйлеп басласа, ол тюбгерекке куьн нурларын сепкендей болады. Аты онынъ Эдильбаева Енбийке Йелкайдар кызы. Тувган 11 наврузда 1957 йылда Ногай районымыздынъ Кумлы авылында. «Биринши класстан алып окытувшы болмага ниет эткенмен. Боьтен де, халкымыздынъ бурынгысына эс берип, бесик йырлар йырлап, эртегилер тынълап, тил байлыгын савяным ман сезгенмен», – деп эскереди Енбийке – аьптемиз озси. Сога коьре 1975 йылда мектепти биткен сонъ онынъ йолы аьзир эди. Ногай тилге суьйими яс кызды Черкесск каладынъ обкимет педагогикалык институтынъ миллет боьлигине аькелди. Окув йигерли, тири кызга бек енъил берилетаган эди. Озине эс эттирип билетаган, «ногай» деген

Эм сосы амалым меним олардынъ юрегине етер ашкышларды таппага амал берди», – дейди Енбийке Йылкайдар кызы.

Тукуй-Мектебте 4 йыл ислеген сонъ, яс окытувшыды яшав йолы Кизляр районынынъ Новокрестьяновка авылына ислемеге элтейди. Эне сол шактан алып бу кьунге дейим 32 йыл узагында ол баьри куьшин, билимин балаларга берип келетыр. «Окытувшы уьйкен аьриптен» деген йогары баады бердилер ога ис йолдаслары. Сол зат босына тувыл, онынъ эткен ислери, еткен етимслери аз тувыллар. «Ногай халк яшавыннан» деген музей муьйисине ол не затлар да салып койыпты, аьр бирисининъ озь таьрийхи бар. Каптал, шонтайлар, бокшалар, шымылдык, савыт-садаклар. Окытувшы озси де шаьйирлик толкынында юзбеге суьйгенлей, онынъ балалары да калемлерин сынайдылар: хабарлар, эртегилер, ятлавлар тептерлерин озьлери мен алып юредилер, кружокта бир-бирлерине окыйдылар.



Ана тил юмалыгы болса оларда байрам кепте оьтеди. Енбийке Йылкайдар кызы балалар ман кишкей спектакльлер коьрсетпеге, ногай тилде йыр йырлатпага, ногай биювлер бийитпеге суьеди. Юмалыктынъ аьр бир куьни кужырлы окувшыларга «Наьсипли вакыт», «Аьлемет майданы» эм сондай баска ойындар, ярыслар олардынъ коьнъиллерин коьтерип турады.



Адабиат дерислерде тек текстлер окып калмай, олар бизим ногай журналларга эм балалар китаплерине дебередилер, «Лашын», «Маьметекей», «Ай, Айданак», «Масаклар». «Шоьл тавысы» газета бетлеринде шыгатаган пайдалы макалалар ман да окытувшысы оларды таныстырып турады.

Енбийке Йылкайдар кызы оьзи де аьр бир дериске бир савга ман келмеге суьеди, мысалы «Келислер» деген темага оьзининъ сыдыраларын язып койыпты:

Басымда бар – Бас келис,  
 Қаймакта бар – Қайтым келис.  
 Йоьнеп кетти – Йоьнелис келис.  
 Туьсиме энди – Туьсим келис  
 Яде «Созыкларды» оьткенде:  
 Юмсақ белги-кыйын зат,  
 Бир еринде турмайган.  
 Қайда болса сен язба,  
 Мине сага маслагат:  
 Ол келеди аьр заман  
 «А», «О», эм «У» буква ман.  
 Ясайдылар косылып,  
 Аь, оь эм уь сеслерди.  
 Кулак салсанъ соьзиме,  
 Алаяксынъ беслерди.

Нурлы юзли, наьсипли кыскайкыдынынъ окытувшылык йолы бек кызыклы. «Ана тилининъ ийги окы-

тувшысы» деп аталган Дагыстан республикасы бойынша ярыста ол сыйлы экинши орынды бийлеген. «Йыл окытувшысы – 20017» деп аталган Савлайроссиялык конкурсыннынъ енъуьвшиси, йогары катериясын аьр бир иси мен яклап келеди. «РД билим тармагынынъ отличниги», «РФ билим тармагынынъ сыйлы куллыкшысы». Тек янъыларда республикада озган «Энъ ийги тувган тил кабинети» деген ярыста ол 3 орынга тийисли болган. Енбийке Йылкайдар кызы калемин де сынаиды, балаларына исси сыдыраларын багыслаиды «Сагынаман», «Уьйкен куьез аькелдинъ» деп атайды ол ятлавларын. Ян косагы ман коьп йыллардан бери берекетли ошак курып, элге коьрим болып яшап турадылар. Онынъ азбарына кирген аьдем тап шешек еннет бавына киргендей болады, кайдай ярасык гуьллер мен толган азбар уьй бийкесининъ куллыкшылыгын, ыспайлыкты суьетаганын коьрсетеди.

Ис йолдасым, аьптем, калемдасым деп санап сосы, суьйдимли кыскайкыды, ога берк ден савлык, мукаят та бийик уьстинликлер йорагым келеди.

*Салимет Майлыбаева*



# Билсенъиз, пайдалы болар...

## 1. ... ИЙСИ КОКЫЙТАГАН КУЪПЕЛЕКЛЕР БАРМА?

Сондай куъпелеклер бар экен. Айтпага, Бразилия еринде, дейдилер. Олардынъ куъшли ийислери бар. Соннан себеп оларды айырым йосыкта уйде саклайдылар. Эм шыгатаган куъшли йислериннен уйкен разылык та аладылар деген токтастырув да этилген.

## 2. ...ЭРТЕГИЛЕРДЕ АЮВДЫ АЪДЕТИНШЕ КОЗГАЛМАГА АВЫР ЭМ ЯЙЫЛГАН БАРМАКЛЫ АЙВАН ДЕП БЕРКИТЕДИЛЕР

Дурасында, аюв бек акыллы, тез юрисли, аъйлежи айванга саналады. Ол оъзине керек заттынъ артыннан сондай бир аста кепте барады, бир бутак та козгалганын сезип болмассыз. Эгер дейим ким ди бирев оннан кашып йоънесе, ол сондай бир куъшли ювырар эм етпеге болар. Саъатте 60 шақырым этпеге болады экен. Оннан баскалай болып, аюв бек ийги ялдап биледи эм балыкты уста кепте тутады. Тереклерге де енъил минеди эм суйген кепте юреди...



## 3. ...КРОКОДИЛЛЕР ЙЫЛАЙМА ЭКЕНЛЕР?

Бурынгы эртегилерде крокодиллер аъдемди ашаганда коъз ясларын тоъгедилер деген токтастырув да бар. Дурысында, ол аъдемди аяп йыламайды экен. Онынъ буйректери аъли толы кепте кепленмеген. Онынъ шаркында тузлар бек коъп эм сол заттынъ коъзлерге себеплиги бек уйкен болып шыгады деген токтастырув да этилинген. Аъне сол темирлери куллык эткенде, айван йылайтаган болып коъринеди экен.

Аявлы, балалар, сиз де билетаган эм окыган кызыклы затларынъыз акында «Лашын» журналга яза турынъыз эм оларды баспалармыз.

Аъзирлеген С.Култаева.





# Халкын Данъклар Келеди



Быйыл май айынын 19-ншы кунинде Ногай район орталыгы Терекли-Мектеб авылында ногай язушысы, фольклоршы Тахир Ажакай улы Акманбетовтынъ 65 йыллыгына багысланган шатлыклы амаллама болып озды. Шарада Астрахань областинен, Ставрополь крайыннан, Карашай-Шеркеш республикасыннан эм Махачкаладан бир куйп алимлер ортакшылык эттилер.

Биринши болып йыйылганлар алдында филология илмилерининъ кандидаты, Махачкаладынъ Тахо-Годи атындагы илми-тергев институтынинъ тамада илми куллыкшысы Фания Кусегенова мерекешидинъ ногай фольклорына эткен косымы акында доклад пан шыгып сойледи. Кусегеновадынъ айтувына коьре, Ашим Сикалиев эм Тахир Акманбетов ногайдынъ фольклорын йьювга, уйренуьвге эм оны ямагат арасында таралтуьвга коьп куйш салганлар. Акманбетов аьли де соны ман каьрлевин бардырады.

Сонъ келген конаклар филология илмилерининъ

докторы Насыпхан Суюнова, филология илмилерининъ кандидаты Шахидат Курмангулова, Карашай-Шеркеш госуниверститетиннен филология илмилерининъ кандидаты Юмав Каракаев эм баскалары Тахир Акманбетовтынъ тергев ислери акында ийги мысаллар келтирип айттылар. Олардынъ айтувлары бойынша, Акманбетов арымай-талмай онлаган йыллардан бери ногай фольклоры ман каьрлейди эм бир неше йыйынтыктынъ авторы болып саналады.

Шарадынъ сонъында Тахир Акманбетов шыгып сойлеп, келген конакларга оззининъ разылыгын билдирген эм сонъгы заманада не зат пан каьрлеви акында айтып озган.

Йыйылганларга уйкен концерт программасы да коьрсетилинген.

*А.Утеев.*



# Кожа Насретдиннинг акында

## Кожа тенъизге таза сувды куяды

Тенъиз ягасында Кожа сувсайды эм бираз сама тузлы сувын ишеди. Сувсыны кайтаяктынъ орынына кайтарам, тамагы тагы да бек кевип баслайды экен.

Ол бираз алдыга карап юреди эм таза сувды табады.

Оны тойганша ишеди. Топтайын да сув ман толтырады. Сонъ сол сувды аькетип тенъизге баърисин де куйып кояды.

— Кобпирме эм тасыма, — дейди ол тенъизге карай берип. — Аьдемлер алдында басынъды йогары коьтерип турма да, мине шынты сувдынъ даьмин татып карашы. Ол кайдай объзи!

## Кожа тереклер олтыртады

Кожа юзимшилик бавында яе бутакларды олтыртады. Оны онынъ танысы коьреди эм оннан сорайды: — Ай, Кожа, олар кайзаман обсееклер эм кайзаман емислер берееклер?! Сага олардынъ даьмин ювык арада татпага кыйын да болар.

А Кожа булай явабын кайтарган:

— Биз де бизим мен шашылмаган тереклердинъ емислерин ашаймызша. Олар бизден алдынгылар ман шашылган тереклер боладыларша. Меним бутагымнан болган тереклердинъ емислерин де келек несиллер ашасынлар. Оннан бир зат та болмас.



# Бабпийден этилинген сорпа

Бир кере Кожа карайды эм булак сувында бабпийлер шомылатаганын коьреди. Ол оларды ысляк болып шабады, ама бабпийлер ушып кетип те каладылар экен.

Кожа булак касында олтырады эм сувга оьтпекти малып, ашап та баслайды. Ким ди бирев оны коьре калады эм ога карай берип, булай дейди:

– Кожа, асынъ таьтли болсын! Аьши не зат ашайсынъ.

– Бабпийдинъ сорпасын, – деген Кожа да ога явапка.

*Баспага аьзирлеген С.Култаева.*



# „Алтын куста“ аманласув байрамы

Карагас авылдынъ «Алтынкус» атлыбалалар бавында 30 куралда уйкен байрам болды, ол бавды кутарув куьнине багысланган эди. Тербиялавшылар Альбина Сагиндикова эм Гульминат Эллиязова уйкен куьш салдылар сол куьн завьклы эм эстеликли болып кетсин деп. Калай тез кетти бала бавындагы наьсипли куьнлер, олар саьбийлер эсинде ярык болып сакланаяклар. Байрам конакларга толы эди, ата-аналар балаларына юмаклы савга эттилер, ол «Миньон» аниматоры, эртеги баьтири балаларды туьрли ярыслар ман завькландырды, енъуьвшилерге таьтли зияпетлер пайландылар. Балалар «Первоклашки», «Учат в шко-



ле», «Воспитатель» деген йырларды конъырав сеслери мен йырлап эситтирдилер, «Птицы, мои птицы», «Прощальный вальс» деген биювлерди бийидилер, ятлавлар окыдылар, баьри яктан да оьнерлерин коьрсеттилер. Келген ата-аналар оьз балаларынынъ оьнерлерине ку-

вандылар. Балаларга дипломлар эм грамоталар, 4 йыл ишинде бала бавында белсен катнаскан ата-аналарга сый кагытлар берилдилер. Сондай сыйлы кагытларга тербиялавшылар да тийисли болдылар. Байрам аспанга туьрли туьсли шарлар ййберуьв мен тамамланды.

*С.Майлыбаева.*



# Сувды Аман Сакласык

Сув дайым да макталган,  
Арктикада, авлакта.  
Авылда эм калада,  
Сув кереге дайым да.  
Сув болмаса, йок яшав.  
Оны баъри биледи.  
Сувсыз баъри кир болса –  
Суймеек бирев бизди.  
Сувды дайым саклавга,  
Эм де таза тутарга, –  
Каър этсин аър бир инсан,  
Онълы болып яшарга!  
Сакланмаса табиат,  
Сув да дайым кир болса,  
Онъмас бир зат ер юзде –  
Келмес кайтып ол бир де!

*Нурислам Оьтегенов, 2 класс,  
Ленин авылы, Ногай районы.  
Орысшадан коьширлген.*



# Яс чемпион



Ата-аналары эм ювыклары бек суьйинедилер, эгер дейим аьли де ясы кишкей бала окувдан баскалай болып, тагы да бир зат пан кызык-сынатаган болса. Ол суьврет ясав, спорт, музыка эм баскалары болмага боладылар. Ийгиси сол, аьлиги заманда коьплеген ийги кружоклар эм секциялары да аз тувыллар. Тек оларга баладынъ суьйими болсын. Сондай суьйим эм ымтылыс бар бир яс кедде. Ол да Ставрополь каласынынъ 23 лицейининъ 1-нши класс окувшысы ети ясындагы Дамир Абдулмежидов. Балага 3 ясы дегенде онынъ ата-анасы Руфат эм Расима калага коьшедилер 4 ясындагы бала оны кайдай бир секцияга аькетпеге тилейди. Спортлык секциясына. Атасы Дамирге эркин куьрес пен каьрлеймен, мен куьшли болакпан, дейди ол.

2016 йыл сентябрь айында, 6 яс шагында, атасы оны тхеквондо секциясына аькеледи. Сол йыл ок яс спортсмен базласларда эки кере енъиледи. Тек Дамир берилмеди, озин туты. Тагы да спорт пан каьрлевин куьшлендирип баслады. Уьстинлик те келмей болмады. 2017 йыл кедде эки кала, эки краевой турниринде енъуьвшиси болды. Сонъ Волгоград каласындагы Россиядынъ кубок рамкасында тувсли белбавлар фестивалинде енъуьвшиси де болды. Енъуьвдинъ тамамы – ак-сары белбавга аттестация этуьви этилинди. Янъы йыллык краевой турниринде 2017 йылдынъ тамамы бойынша йылдынъ ийги спотсмены болды: 5 турнирде 5 алтын медалин казанды. Ол тагы да бир ийги енъуьвге етисти – Москва каласында Россиядынъ чемпионаты рамкасында оьткерилген белбавлар фестивалинде 1-нши орын бийледи. Эндигиси ол Арменияда оьткерилеек Европа чемпионатына ийги кепте аьзирленеди.

Ставрополь каласына кеткенше, Дамир ата-анасы ман Ставрополь крайынынъ Нефтекум районынынъ Янъы-Артезиан авылында яшаган болган. Яс спортсменнинъ уьстинлигинде тренери Вадим Юрий улы Клименкодынъ уьлиси уьйкен эм салдарлы. Дамирдинъ уьстинлигине атайы Минкаил эм тетейи Казипат та суьйинедилер.

Биз де Дамирге тагы да спорт тармагында янъы уьстинликлер сагынамыз!

*К.Мамбетов.*



# Алимхан-чемпион



циясына уйкен аваслык пан барады, заманын тек пайдалы этип йибери. Анасы Гульмира эм биринши класста окыйтаган иниси де аданасын бек суйеди. Окувшыларга сен уйкен коьрим. Сени мен оьктем баьри де ногай йигит.

С.Майлыбаева.



Мурзаев Алимхан Нижневартовск каладынъ №17 номерли мектебининъ 2а класс окувшысы. Ол бек йигерли бала, киокусинкай каратэ мен бек кызыксынады. Нижневартовск калада коьк белбавдынъ иеси болган. Социальный политика бойынша Департамент директоры Е.П.Князев атыннан диплом ман эм медаль мен белгиленген. Каратэ сек-

# Суйимбийке атлы орам

Астана калада Суйимбийке атлы орам ашылган. Бу уйкен ис халклар ара дослыкты беркитеди. Орам ашылууда катнасканлар Татарстан Президенти Рустам Миниханов эм Астана акими Асет Исекешев.

Миниханов оьзининъ соьзинде: «Суйимбийке келбети бизге бек баалы, онда татар халкынынъ яны коьринеди» — деп айткан. Акыйкатлай да Суйимбийкеди савлай тюрк дуньясы сыйлайды эм суйеди. Орам

ашув мырады бас деп 2013 йылда салганлар язувшы Шарбану Бейсенова, скульптор Камиль Мулашев, шайир Жанат Аскербек кызы. Олардынъ ойларын Казахстан эм Татарстан басшылары хош коьрип алганлар.

Суйимбийке ногай Юсуп-мырзанынъ кызы сав дуньяга терен акылы ман, ыспайлыгы ман эм йигерлиги мен белгили болган. Биз оны ман дайым да оьктемсип турамыз!



# Янъы йыйынтык



«Яс йигит» деп аталып Дагыстан китап баспасында белгили ногай шаьйири, коьшируувши эм публицист, Павел Ершов атындагы халклар ара адабиат савгасынынъ лауреаты Анвар-Бек Оьтей улы Култаевтинъ эртегилер йыйынтыгы баспаланды. Янъы йыйынтыкка автордынъ сонъгы йыллар ишинде язылган 5 эртегилери киргистилинген: «Яс йигит», «Шетен», «Тавдагы от», «Эриншек кызлар», «Шал ат».

Автордынъ айтувы бойынша, эртегилер туурли-туурли йылларда язылган. Олардынъ бас баьтирлери асылында дурыслыкты, алаллыкты эм дурыс яшавды суьетаган аьдемлер эм олар яшавда бар кемшиликлер мен эм етиспевликлер мен куьреседилер эм енъедилер. Онынъ акында, соьзсиз де, йыйынтыкка

кирген эртегилери ийги кепте хабарлайдылар.

Дагыстан китап баспасынынъ бас редакторы Лариса Голубевадынъ айтувы бойынша, сосындай йыйынтык дагыстан халкларынынъ бес тилинде, сонынъ ишинда ногай тилинде де, аьлемет кепленуув мен биринши кере шыгып туры. Эгер дейим окывшылар яратып алсалар, соьйтип кишкей окувшылар уьшин шыгармага мырат этемиз. Алды кере биз Анвар-Бек Култаев коьширген болып уллы орыс эртегишиси Павел Ершовтынъ «Буькир тай» деп аталган белгили эртегисин сосы йосыкта шыгарып караганмыз эм йыйынтык туурли выставкаларда ортакласкан эм ийги баа да алган. Аьли сосындай йосыкта балаларга ийги китаплер шыгарув яшавга кирип баслайды эм соны баславшыдынъ бириси бизим Дагыстан китап баспасы. Республика еринде атлары белгили деген балалар шаьйирлерининъ эм язувшыларынынъ китаплерин ийги этип шыгарув орын таппага болар деген ниет пен этилинеди. Китап баа олтырады, тек заманга келисли эм коьркинли. Китапти уста суьврет ясавшы А.Качаев ярастырган. Мелованный кагыт пан шыгарганмыз эм ойлаймыз ногай балалары автордынъ эртегилерин аларлар эм суьйип окырлар.

Сосы шыгып турган «Яс йигит» йыйынтыгын автордан алмага амал бар. Автор ман байланыс тутув номери 8 988 296 97 76

*З.Шугаипова, «Лашын» журналынынъ куллыкшысы.*





# БАЗЛАС ЗАВЫКЛЫ ОБТТИ

Савлай Элимиздегиндей болып, балалар коршалав куынинде Ногай районында да коыплеген озгерислер обттилер, олардынъ бириси: тектикшилер ярысы тоьгерегине 29 окувшыды йыйды. Олар эки куыпке боьлиндилер: 8 ястан алып 10 яска дейим эм 10 ястан алып 14 яска дейим. Бас деп ГИБДД куллыкшылары катнасувшыларга йолды азирледилер. Баьри яслар да бек шалыстылар, ама аьр бир ярыстынъ оззининъ енъуьвшилери боладылар. Бу базлас та энъ куышлилерди коьрсетти. Биринши 8 ястан алып 10 яска дейим йыйналган куыпте 1 орынды Аблезов Ансар, 2 орынды Танбулатов Азим эм 3 орынды Манатов Азим алдылар. Экинши куыпте 1 орынды байырлады Ахмаджанов Мамат, экинши орын тийди

Курганов Арифуллага эм уьшинши орынды алды Мурзагишиев Мурзахан. Тектик базлас кутылган сонъ энъ ийги кесеги басланды, енъуьвшилерди кутлав. Оны ашты район администрация басынынъ коьмекшиси Хамидулла Абдулвагап улы Саитов. Ол озь соьзинде спорттынъ аьр аьдемге кайдай уьйкен пайдасы бар экени акында айтты. Билим тармагынынъ куллыкшысы Бекмурзаев Байрамали Камбий улы балаларды байрам ман кутлады эм оларга аьр бир ярыста енъуьвди йорады. Енъуьвшилер грамоталар ман бирге акшалай савгалар алдылар. Баьри катнасувшылар да сый кагытлар ман белгилендилер. Ярыс суьвретке туьсуьв мен тамаланды. Сосы аьлет ярысты уйгылаган «Яслык» организациясы, етекшиси Сафар-Али Сарсеев.

*Салимет Майлыбаева.*



# Тайгалы маслагатлар

## Серник пен ойнаманъыз...

Булай алып караганда, бала кайда яшаса да, не зат этсе де, коьзи боьлмедеги серникти коьрмей болмайды. Кайбир заманда ол уьйинде ким де бирев газпеш якканын коьреди эм оны оьзи де кайтараламага ымтылыслы болады. Ондай мысаллар бек коьп. Соны ман аьли биз кыз эм эр балаларга маслагат беремиз: серник пен ойнаманъыз. Оьз басыннан серник пен ойнап, сонъ авыр аьлге калган баладынъ акында мине тоьмендеги ятлавда айтылады. Оны эс берип окып каранъыз эм тамам этинъиз: керекпе экен балага, колына алып серник пен ойнамага?

Досларым,  
Айтайым, эсте тутынъыз –  
Оны ман ойнап,  
Тек баьлеге каларсыз!!!

Мен серниктинъ  
Кутыгын колыма алдым,  
Баьрин де  
Йыйып сыпырага салдым  
Фыйерверк  
Этип ойнарга суьйдим –  
Баьри де  
Янды. Каранъада калдым.

Бир зат меним  
Сакланмаган эсимде!  
Тек от ялын  
Куьйдирди бетимди.  
Кышкырык  
Басланды сав уьйимде –  
Оны этпен мен  
Бир шак эндиги!..



# Сөзләрди тавып, Язып каранъыз...

1.  
Сав дуныяды йылытады,  
Арув не зат билмейди,  
Терезенден карайды,  
Аты онынъ .....

2.  
Суйсенъ, сувда сен шомыл,  
Суйсенъ, ойна сен кумда.  
Суйсенъ, уйлер сен яса,  
Алсанъ, турмас ол колда!

Кобз йиберип карашы,  
Аты онынъ, бил, .....

3.  
Авлакта эм бавдада,  
Ол шувлайды, шувлайды.  
Уй ишине кирмеге,  
Эш бир заман болмайды.

Мен бир якка бармайман,  
Тек токтавын саклайман.  
Оъзи дайым кытымыр,  
Дурыс аты ол – .....

4.  
Авлагымда  
Мен сокпак ман бараман,  
Тогерекке  
Кобз салып та карайман.  
Ийислери  
Куьлле ерден кокыйды,  
Ийис алсанъ,  
Савлай бурын «шокыйды».

Куьн коьзи конады,  
Эртенъ онынъ уьстине,  
Ысла колга, ярайды,  
Кейпинъ келе оьзине.

Оны суье бизим атай,  
Йыйып баслай эм тетей.  
Кобнъил бойлап оьсеген,  
Шоьл оьсими – .....

5.  
Ярып кара экевге,  
Онынъ иши кып-кызыл.  
Ашамага суьеди,  
Карындасым Кызылгуьл!

Ашاپ-ашап басласанъ,  
Татым бола арамыз.  
Быйыл яйда онъ болган,  
Ашамага бу .....





# Соколёнок Лашын

4/2018

**ИЮЛЬ - АВГУСТ**

Иллюстрированный детский журнал.  
Издается один раз в два месяца.

**Учредитель**

Министерство печати и информации РД.

Регистрационный номер  
ПИ №ТУ05-00348 от 01.12.2016г.  
выданный управлением Роскомнадзора  
по Республике Дагестан.

Издается с января 1990 г.

**Руководитель – главный редактор**

Мурад Ахмедов

**Редколлегия:**

А.Исмаилов (зам. гл. редактора)

Т.Зургалова (отв. секретарь)

А.Култаев

Б.Кулунчакова

М.Авезов

С. Майлыбаева

С. Култаева (редактор выпуска)

**Художественный редактор** З.Даганов

**Технический редактор** Т. Лузина

**Художник номера** А. Самарская

Формат 60x84 <sup>1</sup>/<sub>8</sub>.

Уч. изд. л. 3,29.

Уч. печ. лист 3,26.

Бумага офсетная.

Выход в свет 18.08.2018 г.

Тираж 198 экз.

Заказ №230.

**Типография:**

ООО «Издательство «Феникс-пресс».

**Адрес типографии:**

367018, РД, г. Махачкала, ул. Петра I, 61.

**Редакция и издатель:** Государственное бюджетное учреждение Республики Дагестан «Редакция республиканских литературных журналов «Соколёнок» и «Литературный Дагестан».

**Адрес редакции и издателя:**

367000, РД, г.Махачкала,  
ул. Даниялова, 55.

**Электронный адрес редакции:**

litdag@mail.ru

Ногайский язык.

Индекс: на год - 63238,  
на полугодие - 78432.

Цена свободная.